



cus valedicturus principi Auriaco, opportune Hagam venit. Scribitur inde res Gallum inter, Suecum et Cæsarem compositas, sed hac conditione ut bellum duret, donec Cæsar satisfecerit confœderatis vel læsis qui ad Gallum aut Suecum confugerunt. Ordines Batavici talem pacem nolunt et dicunt, nil aliud esse quam diuturnum bellum, sed larva pacis tectum. Idem Ordines duodecim navibus potestatem dederunt in mari Hispanico omne quod poterunt, damnum inferendi Lusitanis in pœnam talionis; nam Lusitani qui pacem cum illis habere volunt, in Farnambuco et Brasilia duodecim navibus Batavos vexant et interrogati cur id faciant, dicunt esse naves sibi rebelles. Idem responsum dabunt naves hollandicæ, nimirum se propria auctoritate contra voluntatem Ordinum piraticam agere.

Credo R. V. intellexerit quid in Zeelandia acciderit in ianuario huius anni; detectum est alluvione maris ad littus Domburganum in Walacria, Zeelandiæ insula, sacellum. Fama tota Hollandia sparsit esse sacellum catholicum; argumento erant imagines variæ repertæ, sed ubi cordati et intelligentes rem inspexerunt, invenerunt esse sacellum idolatricum, nam in ea est reperta ara Neptuni cum hac inscriptione:

*Deo Neptuno*

*Ammius*

*Octavius*

*Justus*

*V. S. L. M.*

Alii lapides quatuor in formam arcus supra desinentis inscripti fuerunt deæ Nehalenniæ:

*Deæ Nehalenniæ*

*Summatonus*

*Primanus*

*V. S. L. M.*

Si R. V. cum Paulo ignotam illam deam nobis annuntiare possit, gratum id nobis erit. Inventa etiam est moneta aurea, argentea, ærea, cui nunc Vitellius inscriptus, nunc Pius Severus Augustus, nunc Orinus. Fragmenta lapidum referebant alia semilunam, alia Palladem, alia aliud. Vidit non ita pridem R. P. Junius pagum maritimum non procul Sceveringa versus occidentem, dictum Ter Heye, ubi plurimæ domus arena tectæ et repletæ; templum brevi erit etiam sub arena. Gazettæ flandricæ Brugis impressæ ubi intellexerunt, litem esse inter DD. urbis Domburganæ et DD. Walacros de imaginibus repertis, et Domburganos inclusisse illas templi sui sacrario, scripserunt, diis gentium locum dare quem B. Virgini et sanctis negarunt, et si imagines fuissent sanctorum, litem fore inter heterodoxos illos quis prior imagines illas confringeret.